



Павелай Филипп хотын hүзэглэгшэдэй бүлгэмдэ бэшэhэн хандалга

1 ¹Филипп хотын hүзэглэгшэдэй бүлгэм, танай хүтэлэгшэд болон танай туhалагшад, таанадта Иисус Христосой зарасанар болохо Павел Тимофей хоёр бэшэнэ. ²Манай Эсэгэ Бурхан болон Дээдын Эзэн Иисус Христос таанадые үршөөл хайрадаа хүртөөжэ, амгалан тайбан байлгахань болтогой!

Павел филиппынхидэй түлөө зальбарна

³Таанадые ханаха бүхэндөө би Бурхандаа баяр баясхалан хүргэжэ байдагби. ⁴Тиин та бүгэдын түлөө зальбарха бүхэндөө би баяр жаргалтайгаар зальбардаг хүнби, ⁵юундэб гэхэдэ, таанад Hайн Мэдээсэл дэлгэрүүлхэдэмни анха түрүүшын үдэрhөө эхилэн мүнөө болотор намда туhалжа хамhалсажа байгаат. ⁶Тиихэдэ таанадай дунда үлзы хайхан үйлэ хэрэг бүтээжэ эхилhэн Бурхан Иисус Христосой заларан ерэхэ үдэр хүрэтэр тэрэ хэрэгээ залируулангүй бүтээжэл байха гэхэн хатуу этигэлтэй байнаб. ⁷Таанад хододоо минии зүрхэ сэдхэл соо оршонот! Тиимэхээл иигэжэ таанадта ханаагаа табижа байдагни зүб юм. Түрмэдэшье байхадамни, Hайн Мэдээсэлые хамгаалха, хатуугаар баталха эрхэ сүлөөтэйшье байхадамни, та бүгэдэ намда Бурханай даалгаан ажалда хабаадалсажа туhалжа ябадаг hэнта. ⁸Иисус Христосой таанадта хайра дуратай байдагтал тон адляар миниишье та бүхэндэ хайра дуратай байhые Бурхан мэдэнэ.

⁹Бурханда, бэе бээдээ бүри ехээр дуратай байhайт, үнэн зүб юун бэ гэжэ бүри хайнаар мэдэрhэйт, сэдхэхэйт гэжэ би зальбарнаб. ¹⁰Тиигэбэл таанад үнэн зүбые шэлэхэ аргатай байхат. Тиигээд Иисус Христосой заларжа ерэхэ үдэр таанад арюун сэбэр, ямаршье

гэмгүй байхат. ¹¹ Хэһэн бүхы үйлэ хэрэгүүдтнай Иисус Христосой нүлөөгөөр үнэндөө һайн һайхан байхал. Тиигэжэл Бурхан алдаршаха, тэрээндэ магтаал соло дуудаха.

Христосто алба хэжэ ажамидарха тухай

¹² Аха дүүнэрни, намтай ушарһан бүхы юумэн Һайн Мэдээсэлэй бүри амжалтатайгаар дэлгэрхэдэ үнэхөөрөө аша туһатай байгаа юм гэжэ мэдэжэ байгты. ¹³ Христосто алба хэдэг байһанһаа боложо түрмэдэ ороһон тухаймни бүхы ордоной харуулшад болон бусадшые эндэ байһан зон мэдэдэг болоо. ¹⁴ Түрмэдэ һууһан ябадални хүзэглэгшэдэй олоной хүзэг бүри бэхижүүлбэ, тэдэнэр бүри зоригтойгоор, айлтагүйгөөр Бурханай мэдээсэл номножо захалба.

¹⁵ Тиихэдээ нэгэ зариманиинь манда атаархаһан, маанадтай арсалдаһан шалтагаанһаа Христос тухай номноно, харин нүгөө зариманиинь һайн дураараа, туһалхаяа хүсэжэ байһан дээрэһээ номноно. ¹⁶ Һайн дураараа номногшод Бурханай намда Һайн Мэдээсэл хамгаалха үүргэ даалгаһыень мэдэнэ ха юм. ¹⁷ Харин намда атаархаһан номногшод Христос тухай үнэн зүрхэнһөө айлрадханагүй. Тэдэ намайе түрмэдэ бүри ехээр зобоолгохо зорилготойгоор лэ номноно.

¹⁸ Зай, яахаб даа. Христос тухай үнэн зүрхэнһөөшые һургахада, үнэн зүрхэнһөөн номноһон хэбэр үзүүлэншые һургахада би адлил баясанаб. Саашадаашые баясажа байхаб. ¹⁹ Ушарынь гэхэдэ, танай зальбаралай ашаар, Иисус Христосой Һүлдын туһаламжаар би сүлөөдэ гарахаб гэжэ һайн мэдэнэб. ²⁰ Үүргээ дүүргэхэдээ, эшэхэ улайхаар юумэ хэхэгүйб, харин хэтын хэтэдэ, илангаяа энэ сагта зоригтой зүрхэтэй байхаб, тиин ямаршые юумэ хэхэдээ, амиды байна гүб, али үхэнэ гүб, илгаагүй, Христосые алдаршуулхаб гэжэ бүхы һанал бодолоороо хүсэжэ, найдажа байнаб. ²¹ Минии ажамидаралай зорилго – Христос гээшэ. Харин минии үхэл бүришые ехэ аша туһа асарха юм. ²² Тиихэдэ амиды ябахадаашые үрэ дүнтэй ажал хэхэ аргатай хүм. Тиимэһээ алиниинь шэлэхэ ёһотойгоо мэдэхэгүй байнаб. ²³ Тэрэ хоёр зүг хоюулан намайе өөр тээшээ татаад байна. Үхөөд, Христостой суг байхые аргагүй ехээр хүсэнэб. Энэнь ушаргүй һайн шэлэлтэ юм. ²⁴ Харин амиды мэндэ ябабални, таанадта үлүү шухала хэрэгтэй юм. ²⁵ Би энээниие һайн мэдэнэб, тиимэһээ таанадтайгаа үлэхэб, этигэл хүзэгэйтнай нэмэгдэн бэхижэхэдэ, баяр жаргал асархада та бүгэдэнтэйгөө байжа туһалхаб. ²⁶ Тиигээд

дахин таанадта ошоходомни, намаар бахархаха бүришье хайн шалтагаан таанадта олгогдохо*.

²⁷ Эдэ бүгэдэндэ нэмэжэ хэлэбэл, таанад Христос тухай Хайн Мэдээсэлэй хургаһан ёһоор амидарха ёһотойт. Тиимэһээ таанадта ошоно гүб, али ошонгүй байна гүб, таанад булта нэгэ зорилготой, Хайн Мэдээсэлэй хүзэгэй түлөө һанал нэгэн тэмсэнэт гэжэ дуулаһайб. ²⁸ Дайсаднаа хэзээдэшье бү айгты, хододоо зоригтой зүрхэтэй байгты, тиигээ һаа тэдэнэй хосорхые, харин өөһэдынгөө абарагдахые харуулхат. Бурхан таанадта тэрэ абаралга үршөөхэ. ²⁹ Ушарынь хэлэбэл, таанад Христосто гансал хүзэглэн алба хэхэ бэшэ, харин тэрэнэй түлөө зоболон амсан үүргээ бэелүүлхэ табилантай ха юмта. ³⁰ Мүнөө таанад намтай хамта тэмсээндэ хабаадалсагты. Тиимэ байлдаанда минии урдань тулалдажа байһые хараа һэнта, мүнөөшье тулалдажа байһан тухаймни дууланат.

Христос номгон даруу, тиихэдээ агууехэ юм

2 ¹ Христос таанадые урмашуулжа, хайра дурань һанааетнай заһадаг, Бурханай Һүлдэ таанадые нэгэдхэдэг юм бол, таанадай бэе бээ анхаржа, хайрлажа ябадаг юм бол, ² таанад нэгэ һанал бодолтой, бэе бээдээ хайра дуратай, һанал нэгэн, бодол нэгэн байжа, намайе бүрин баяр жаргалтай болгыт даа. ³ Юумэ хэхэдээ, өөр тухайгаал бодоод бү ябагты, али хүнэй магтаалда хүртэхын лэ тула оролдолго бү гаргагты. Харин даруу номгон байгты, бусад зониие өөрһөө дээгүүр бодожо байгты. ⁴ Гансал өөһэдынгөө бэшэ, харин бусадайнгаа хайн хайханай түлөө һаналаа табижа байгты. ⁵ Таанад Иисус Христостол адли һанал бодолтой байгты:

⁶ *Тэрэ анханһаа Бурханай шанартай байһан аад,
Бурхантай нэгэ зиндаада байха ёһотойб гэжэ
өөр тухайгаа бодоогүй юм.*

⁷ *Харин орондонь хамаг эрхэ түрэээ
тэрэ дуратайгаар орхёод,
зарасын дүрсэ дүрсэлжэ,
маанадтал адли болон,
хүн түхэлтэй мүндэлбэ.*

⁸ *Тэрэ номгон даруу байгаа,*

* Иисус Христосой намда хэһэн хэрэгээр бахархаха бүришье хайн шалтагаан таанадта олгогдохо.

- үхэн үхэтэрөө, хэрээһэн дээрэ үхэтэрөө
Бурханай үгэ дууладаг байгаа.
- 9 *Тиимэһээ Бурхан тэрэниие дээгүүр үргэжэ,
бусад алдарнуудһаа ушаргүй үндэр нэрэ
түрэдэ хүртөөбэ.*
- 10 *Тиимэһээл Иисусай алдарта нэрэ түрэдэ
дээдэ огторгойн, газар дэлхэйн,
доодо тамын амитан бүхэн
мүргэн хүгэдэхэ,*
- 11 *тиигээд Эсэгэ Бурханай алдар солодо,
Иисус Христос болбол Дээдын Эзэн юм гэжэ
Хүн бүхэн айладхажа байха.*

Энэ дэлхэйн гэрэл туяа болохот

¹² Инаг хайрата нүхэдни, таанадтайгаа суг байхадамни, үгыемни ходо дууладаг һэнта. Тээд мүнөө хажуудатнай үгы байхадамни, бүришые найнаар үгыемни дуулажа байха ёһотойт. Гүйсэд абарагдахын тула хүрдэн хүгэдэн ажаллажа байгты. ¹³ Ушарынь гэхэдэ, Бурхан өөрөө сэдхэлдэтнай хүсэлнүүдые бадараадаг, хэхэ ёһотой юумэээ хэжэ байха тээшэ таанадые хүтэлдэг юм.

¹⁴⁻¹⁶ Ямаршые гэмгүй, арюун сэбэр, эрхим хайн Бурханай үхибүүдынъ байхын тула таанад юушые хэхэдээ бү гэмэрэлдэгты, арсалдаа бү гаргагты. Забхай зальхай, нүгэл шэбэлтэй зоной дунда амидархандаа амидарал хайрладаг мэдээсэлые хатуугаар баримталан, таанад тэдэ зоной дунда тэнгэридэ гэрэлтэжэ байһан одо мүшэдтэл адли яларжа толоржо байха ёһотойт. Тиигэбэлтнай Христосой заларан ерэхэ үдэр би таанадаар бахархан омогорхохо шалтагаантай байхаб, бүхы оролдолгонуудни, үйлэ хэрэгүүдни дэмы үнгэрөөгүй гэжэ мэдэхэлби.

¹⁷ Танай этигэл хүзэгтнай, албантнай Бурханда үргэгдэһэн үргэлдэ адли юм. Тэрэ үргэлтэйтнай хамта минишые шуһан үргэл болон адхарха ёһотой байжа магадгүй. Тиигэбэл би та бүхэнтэй хамта баярлажа байнаб. ¹⁸ Тон тиигэжэл таанадшые намтай суг баярлаха ёһотойт.

Тимофей Енафродит хоёр

¹⁹ Таанад тухай мэдээсэл абажа өөрыгөө урмашуулха дуратай байнаб. Тиимэһээ Дээдын Эзэн Иисусай эрхэ мэдэлээр таанадта һаядаа Тимофейе эльгээхэб гэжэ найданаб. ²⁰ Минии хажууда Тимофейһээ

ондоо хэншье тиигэжэ ехээр таанадта ханалаа табижа ябадаггүй юм. ²¹ Бусад зон бүгэдөөрөө Иисус Христосто найшаагдаха юумэ бүтээхэ тухай огто бодонгүй, өөрынгөө амидаралай түлөө оролдожо ябадаг. ²² Тимофейн үнэн шударгуу байханаа баталһыень, тэрэ бидэ хоёрой эсэгэ хүбүүн хоёртол адляар хамта Хайн Мэдээсэл дэлгэрүүлхын түлөө хүдэлжэ байһые таанад өөһэдөө мэдэнэт. ²³ Намтай юунэй ушарха тухай мэдэхэтэйгээ сасуу би таанадта тэрэниие эльгээхэб гэжэ найданаб. ²⁴ Би өөрөөшье Дээдын Эзэнэй эрхэ мэдэлээр хаядаа таанадта ошоход гэхэн бата этигэлтэй байнаб.

²⁵ Намда туһалхаар таанадай эльгээхэн, намтай хамта эндэ ажаллажа, тэмсэжэ байһан манай хүзэглэгшэ дүү Епафродитые бусаажа таанадта ябуулха хэрэгтэй гэжэ би бодобоб. ²⁶ Тэрэ та бүгэдые харахаяа аргагүй ехээр хүсөө, өөрын үбдэһэн тухай таанадай дуулаһанда тон ехээр шаналаа. ²⁷ Тэрэ үнэхөөрөө үбдэжэ, үхэхээс байгаа. Гэбэшье Бурхан тэрэниие хайрлан үршөөгөө; намайешье баһа үшөө ехэ гашуудал зоболондо дарагдахаһаа хамгаалан үршөөгөө. ²⁸ Тэрэниие хараад таанад дахин баясахат, тиигээд бишье голхорхоёо болиход гэхэн бодолтойгоор тэрэниие таанадта бушуухан ябуулбаб. ²⁹ Дээдын Эзэнэй тэрэ хүзэглэгшые баяртайгаар угтажа абагты. Тэрээндэл адли хүнүүдые бултыень хүндэтэйгөөр угтажа байгты. ³⁰ Епафродит Христосой түлөө ажаллажа байхадаа үхэн алдаа, таанадай хэхэ аргагүй юумэ намда хэжэ, тэрэ ами наһаяа хайрлаагүй юм.

Бурханай урда үнэн сэдхэлтэй байха тухай

З ¹ Аха дүүнэрни, Дээдын Эзэнтэй нэгэдэхэндээ баяр жаргалтай байгты гэжэ түгэхэлдөө хэлэхэ байнаб. Урда бэшэһэн юумээ дахин дабтахадамни намда хүндэ бэшэ, харин таанадта аша туһатай юм. ² Нохойнуудтал адли өөһэдыгөө абажа ябадаг зонһоо бээсэ хэргылэгты, нүгэл шэбэл үйлэдэдэгшэдһөө хэргылжэ байгты, бэлгээ отолуулагты гэжэ баадхадаг зонһоо хэргылжэ байгты. ³ Тэдэнэр бэшэ, харин бидэнэр жэнхэни «отолуулга»* хэхэн зон гээшэбди, юуб гэбэл, бидэ Бурханай Хүлдын ашаар Бурханда мүргэжэ, Иисус Христостой нэгэдэхэндээ бахархан баясанабди. Бидэ бэсын эрхэтэнэй отолуулха ёһололдо найданагүйбди. ⁴ Гэхэтэй зэргэ би тиимэ мэтын юумэндэ найдаха аргатай байгааб. Хэрбээ бэсын эрхэтэниие

* Эндэ жэнхэни «отолуулга» гээшэнь жэнхэни Бурханай хүнүүд гэхэн удхатай юм.

отолуулха ёһололдо найдаха ханаатайшуулай байбалнь, би хэнһээшье үлүү тиигэжэ найдаха шалтагаантай хүнби. ⁵ Би түрэхөөр наймадахи үдэртөө бэлгээ отолуулһан байгаа. Би болбол Израильһаа уг изагууртай, Вениаминай обогой жэнхэни еврей хүнби. Моисейн Хуули хэшээлтэйгээр сахижа байдаг фарисей байхадаа, ⁶ би хүзэглэгшэдые гайтайгаар хашан мүрдэдэг байгаа. Бурханай урда үнэн сэдхэлтэй байхын тула би Хуулиин бүхы заабаринуудые сахижа, ямаршье гэмнэмээр юумэ хээгүй бэлэйб. ⁷ Урдань ехэ хэрэгтэй, шу хала гэжэ тоолодог байһан юумэнүүдээ мүнөө, Христосһоо боложо, хэрэггүй хоһон гэжэ тоолоноб. ⁸ Бүри үнэтэй сэнтэй юумэнһээ, минии Дээдын Эзэн Иисус Христосые мэдэрхэнээ гадна бусад бүхы юумэнүүдые би хэрэггүй ба дэмы хоһон гэжэ тоолоноб. Христосһоо боложо би бүхы юумэнһээ арсааб. Христосые оложо, тэрээнтэй сүм нэгэдэхын тулада би бусад бүхы юумые юун дээрэшье тоолоногүйб. ⁹ Тиимэһээ би Хуули сахижа байһанаараа бэшэ, харин Христосто этигэл хүзэгтэй байһанаараа Бурханай урда үнэн сэдхэлтэн болоноб. Бурхан этигэл хүзэгөөрнь лэ хүниие үнэн сэдхэлтэнэй тоодо оруулдаг юм. ¹⁰ Христосые, тэрэниие амидыруулһан хүсые мэдэрхэ гэжэ хүсэнэб. Тэрээндэл адляар зобохо, тэрээндэл адляар үхэхэ дуратай байнаб, ¹¹ тиигэбэл би өөрөө үхөөд амидырха байгаа.

Зорилго эрмэлзэлдээ хүрэхэ тухай

¹² Би зорилго эрмэлзэлдээ хүрөөб, хэхэ ёһотой юумээ бүгэдыень хээб, эрхим түгэс болооб гэнэгүйб. Гэхэдээ Иисус Христос намайе ямар шагналда хүртөөхөөр өөртөө татажа абаа һэм, тэрэ шагналыень абаха гэжэ би оролдожо байнаб. ¹³ Аха дүүнэрни, тэрэ шагналыень абааб гэжэ би үнэхөөрөө һананагүйб. Яаба тиибэшье, би үнгэрһэн юумээ мартажа, ерээдүй юумэндээ хүрэхэ гэжэ бүхы шадлаараа шармайнаб. ¹⁴ Тиимэһээ би мүнхын амидаралай шагналые абахаар сэхэ зорижо ябанаб. Тэрэ амидаралда Бурхан намайе Иисус Христосоор дамжуулан дуудаһан байгаа.

¹⁵ Оюун сэдхэлээрээ болбосон хүн бүхэмнай иимэл һанал бодолтой байха ёһотой. Хэрбээ зариманайтнай ондоо һанал бодолтой байбал, Бурхан тэрэниетнай эли болгожо харуулхал. ¹⁶ Яабашье бидэ мүнөө ойлгожо абаһан гуримаа саашадаашье баримталха ёһотойбди.

¹⁷ Аха дүүнэрни, намайе һажаажа байгты. Манай таанадта харуулһан үльгэр жэшээгээр ажаמידаржа байдаг хүнүүдые хаража, дуряжа

байгты. ¹⁸ Олон хүнүүд Христосой хэрээхэндэ хадуулжа үхэхэн ябадалда эсэргүүсэхэн дайсад мэтэ ажамидардаг гэжэ би таанадта урдань оло дахин хэлэжэ байгаа нэм, мүнөөшье нулимсаа гарган дабтажа байнаб. ¹⁹ Бэе махабадайн хүсэлэнгүүд тэдэнэй бурханиинь юм. Тэдэ эшэжэ байха ёһотой юумээрээ омогорхожо байна, энэл дэлхэйн юумэнүүд тухай тэдэ бододог. Тиимэхээ тэдэ тамада орожо хосорхол! ²⁰ Харин бидэнэр тэнгэрийн харьяалай хүнүүд гээшэбди, бидэ тэнгэрийнхээ өөһэдынгөө Абарагша, Дээдын Эзэн Иисус Христосой ерэхые аргагүй ехээр хүлээжэ байнабди. ²¹ Бүхы юумые өөрынгөө эрхэ мэдэлдэ оруулха аргатай хүсэ шадалаараа тэрэ манай ахир һулахан бэенүүдые хубилгажа, өөрынгөө алдарта бээтэй адлихан болгохо юм.

Павел хүзэглэгшэдые зоригжуулна

4 ¹ Инаг хайрата аха дүүнэрни, би таанадые ехэл үгылжэ байнаб. Таанад намайе баяр жаргалаар дүүргэнэт, таанадаар би омогорхоноб. Инаг хайрата аха дүүнэрни, иигэжэл Дээдын Эзэндэ үнэн сэхэ байгты.

² Эводи Синтихи, та хоёр һамгад хоорондоо хэрүүл хэхээе болигты гэжэ ехэл гуйнаб, та хоёр Дээдын Эзэнэй мэдэлдэ байна ха юмта. ³ Шишье, үнэн сэхэ хүдэлмэрилэгшэмни, баһа тэдэ эхэнэрнүүдтэ туһалаарай. Тэдэнэр намтай, Клементтэй болон бусадшые хүзэглэгшэдтэй хамта Һайн Мэдээсэлые эдэбхитэйгээр дэлгэрүүлээ юм. Тэдэ зоной нэрэнүүдын мүнөө Бурханай номдо бэшэгдээ.

⁴ Дээдын Эзэнтэй нэгэдэхэндээ ходо баясажа байгты. Баясагты гэжэ би дахин хэлэнэб. ⁵ Хүн бүхэндэ номгон даруугаар хандажа байгты. Дээдын Эзэн удангүй заларан ерэхэ. ⁶ Юундэшые ханаагаа бү зобогты, зальбарха бүхэндөө Бурханда баясхалан хүргөөд, хэрэгтэй юумээ гуйжа байгты. ⁷ Тиигэбэл Бурхан таанадта хүнэй гүйсэд ойлгохын аргагүй амгалан тайбан байдал үршөөхэ, тиин тэрэ амгалан байдал зүрхэ сэдхэлыетнай, һанал бодолыетнай Иисус Христосой ашаар сахижа байха.

⁸ Аха дүүнэрни, таанад һанал бодолдоо үнэн зүб, шулуун сэхэ, һайн һайхан, арюун сэбэр, илдам налгай, магтаалда хүрэмөөр юумэнүүд тухай сэдхэжэ ябагты гэжэ түгэсхэлдөө захижа байнаб. ⁹ Минии хэлэжэ, юумэ хэжэ байхада намһаа һуража, ойлгожо абаһан бүгэдые бээлүүлжэ байгты. Тиигэбэл зүрхэ сэдхэлдэмнай, һанал бодолдоннай амгалан байдал үршөөдэг Бурхан манай дунда оршожо байхал.

Тухалһанай түлөө баяр хүргэнэ

¹⁰ Нилээд удаан сагай үнгэрһэн хойно дахин намда һаналаа табижа байхадатнай Дээдын Эзэнтэй нэгэдэһэн минии амидаралда ехэ баяр боложо байна. Таанад урдань нам тухай бододоггүй байгаат гэнэгүйб, урдань таанад намайе анхаржа байһанаа харуулха арга боломжогүй байгаат. ¹¹ Юумээр дуталдаһандаа тиигэжэ хэлээгүйб, би байһан юумээрээл сэдхэл дүүрэн байжа һурашаһан хүнби. ¹² Би дутуу дундашые, элбэг баяншые байдалда амидаржа шадахаб. Бүхы юумэндэ һурааб, ямаршые сагта, хаанашые садхалан гүб, али үлдэнэ гүб, элбэг дэлбэг юумэтэй гүб, али дутуу дунда ябана гүб илгаагүй һанаа дүүрэн ябадагби. ¹³ Христосой намда үршөөжэ байһан хүсэ шадалаар би ямаршые байдалые дабаха аргатайб.

¹⁴ Тиигэбэшые, гай бэрхэшээлдэ ороод байхадамни намда тухалхадаа, ехэл һайн хэрэг бүтээгээт. ¹⁵ Македонииһоо гараад Һайн Мэдээсэл номножо эхилхэдэмни гансал танай хүзэглэгшэдэй бүлгэм намда тухалжа, гансал танай бүлгэм минии олзо гарзые хубаалсажа ябадаг байһые таанад, филиппынхид, һайн мэдэнэт. ¹⁶ Фессалоники хотодошые байхадамни таанад хэдэн удаа намда хэрэгтэй юумэ эльгээгээ һэнта. ¹⁷ Таанадһаа юумэ абаха зорилготойгоор энээниие хэлэнэ бэшэб, харин таанадай шагналда нэмэри болохо юумые хараха һанаатайгаар хэлэнэб. ¹⁸ Би таанадай эльгээһэн бүхы юумые абааб — тэдэ бүхэн намда хангалтай хүрөө. Таанадай үгэһэн бүхы бэлэгүүдые Епафродит намда асаржа үгөө, мүнөө хэрэгтэй бүхы юумэн намда байна. Хангал һайхан уталга үргэхэдэ Бурхан ехэ дуратай байдаг, тон тиигэжэл тэрэ танай бэлэгүүдтэ баясана. ¹⁹ Бурхамни Иисус Христосой аша туһаар өөрын элбэг дэлбэг баялигһаа таанадта хэрэгтэй бүхэниие үршөөһэй гэжэ би зальбарнаб. ²⁰ Манай Эсэгэ Бурхан хэтын хэтэдэ алдар солотой байһай! Болтогой!

Түгэсхэлэй үгэнүүд

²¹ Иисус Христосой мэдэлдэ байһан Бурханай хүнүүдтэ минии мэндые дамжуулаарайгты. Намтай хамта байһан хүзэглэгшэд таанадта амар мэндые хүргэнэ. ²² Эндэ байһан Бурханай хүнүүд булта, илангаяа хаанай ордондо ажал хэгшэд таанадта амар мэндые хүргэжэ байна.

²³ Дээдын Эзэн Иисус Христосой үршөөл хайра та бүгэдэнтэй оршожо байг лэ.